

摘藻堂四庫全書薈要

集部

欽定四庫全書薈要

集部
御選元詩卷十七

詳校官原任主事_臣李斯咏



欽定四庫全書薈要卷一萬八千四百二十九

集部

御選元詩卷十七

五言古詩六

黃潛

雜詩二首

晨起步南園旭日朗以清
葵花衆草中粲粲敷丹榮
流光非汝私獨爾心自傾
覽物有深懷佇立方含情
春風著萬物悠悠皆自私
可憐兒女花榮悴更相持
獨



有澗底松偃蹇如不知何疑揚執戟草元鬢若絲

效古五首

上山見明月下山月相隨月豈知愛我我行自見之故
山日以遠故人不可思殷勤謝明月願爾無時虧

女美衆所悅士窮世所輕輕重安足言泥盡水自清淮
陰初寄食曲腰胯下行季子黃金多妻嫂來相迎自古
已復然歎息空吞聲

擊石乃有火石火光不揚攀天亦有路天高路何長嗟

峨萬古雲下覆歌哭場富貴誠足多貧賤不可忘

落花隨風吹各自東西飛花飛既不息水流復無極同
生不同歸能勿異顏色木生則有枝豹死則有皮悠悠
岐路間多言亦奚為

飲酒莫盡醉盡醉無餘歡讀書莫弔古弔古多悲酸蕭
艾蔽中野白露摧芳蘭鳳飢不得死鴟梟食琅玕去去
復去去采芝青雲端

晚晴

洩雲散積雨林水含餘清披衣有奇懷偶從林叟行新
晴遠峰麗夕陰孤花明曠日固所虞聊茲息營營

寄方子踐子發

窮居悵無遂徂歲聿載陰飛翹隕芳萼候蟲厲哀音急
颼扇叢薄泣露栖喬林撫景慨往古端操思繼今折蘭
合幽佩解纓濯清潄石林宵葱蒨佳柏鬱蕭森遺世豈
余敢匡時非我任覽已謝高軌即事念所欽纏綿阻道
里緬邈眺岡岑委懷竚芳訊貽好枉規箴

東園晚歸

泙忍嬰近務超遙愛佳辰興言望東菑良苗藹津津鄙
人昧時趨曠途夙所遵幸遠簪組累稍欣田圃鄰兀兀
登故畦悠悠睇城闔理穢出新竹撼枯落荆薪夕日逗
遠川餘暉散衣巾疊疊觀物變依依念農人渠渠長者
言惻惻非賤貧

休日集于城南

投耒從遠遊牽世乖明略豈不畏簡書未能置丘壑崇

岡近盤互春物紛照灼休沐集諸彥迂趾惠前諾稍空
林中樽復詠霞上作迢迢歷虛壠靡靡瞰城郭脩楊蔭
晴渚野櫻散朱萼撫時悼推斥畢景顧棲托損益向子
明才能賈生薄瞻言觀歲寒無將愧場藿

曉望

城頭烏鳴曙起坐理冠幘開窓寫遙望煙霧竟川澤喧
喧市聲動漠漠井氣白如何山中人歲暮塵埃客

龍灣夜泊

乘潮出遠浦日暮北風平高亭不可望遙遙笳鼓聲月
明寒雁下江空夕煙生非關川途念沉憂坐自盈

陪諸老夜飲

世故不可料忽如浮雲移坐令百年內顛倒殊歡悲顧
惟我與公異代同一時覽古既深慨撫今亦餘噫長川
去悠悠青山莫委蛇向來遠遊意我行方遲遲咄哉有
志士卒歲恒寒飢況復託渺茫欲與千載期盈虛信天
運廢興豈人為願公姑舍是一觴聊可持

西峴峰

層雲抱春岑急瀨洩嵌竇脩蹊入窈窕衆綠蔚以茂名
亭標水樂柱折荒碑仆幽尋得緇廬亂石扶結構青精
午堪飯碧澗寒可漱平生慕真賞及此成邂逅冥探指
絕頂有路忽通透緣蘿度蒙密翠氣濕衣袖寄身沈寥
內下睨人寰陋清謳雜風竹大嘯落巖狖東峰在眉睫
可望不可就同遊却何時瑤草春已秀

夜興

秋氣入病骨殘夢翛然驚芭蕉葉間露風過皆成聲攬
衣沈寥內搔首天河橫飢蟲語不休中宵誰汝令孤鴻
亦何苦犯霜度微明悠悠念羣動百感忽我并大化儻
不爾吾其免營營

送凌吉叟之杭州教授

浙水西八州維杭實名都古來萬人海逐逐無賢愚以
茲百年後淳朴古不如翩翩誰家兒白馬驕路隅春風
樊樓醉一笑百斛珠亦有朱門家齊謳間吳歛綃綺散

煙霧繽紛被僮奴可憐彼蚩蚩久為紅塵驅頽俗如波
瀾孰障羣流趨又如敗屋壁風雨須人扶博士非冗官
豈即無良圖當令歌舞場化作絃誦區行矣循所務辭
章信其餘春風摻別衣晴沙秀寒蘆何以贈子行白雲
不可呼聊持狂者言用比貂襜褕

晚泊釣臺下

四山環一水遺臺故巔岼那無漁樵居政復不敢安舍
舟衝微雨憑軒俯清灣念昔乘興來無從寄遊觀今我

有行役乃爾容躋攀山靈豈愛我為解塵土顏落日莫
蘋藻清風聞珮環幽尋不可極林暝吾當還却去望層
碧孤舟生晚寒

重登雲黃山

茲山實靈竒吐納變舒慘太常闕弗錄名號何駢黠重
華秩山川盛典軼封碣蒐遺多綸綍蠲潔羅醢醢腐儒
世所貸薄藝守鉛槧無能旅駿奔徒取肆遊覽霖潦時
始收天地餘靄掩嵐光乍璘璫石狀終黤黻行行恣芒

屨往往得鼃坎冒進誠近貪自畫將豈敢久之零埃豁
秀色坐可攬青熒插鋒鏑翕輭披菡萏崖奔馬駢駢石
踞虎耽耽高尋指天路幽矚極元宮前行幾台背後或
兩髦髧緣岡既蹠蹠登嶺仍輶輶舉頭塔廟湧地平忽
如毯天人所食息瓊玖化餘堪林輝寶燈燒風語金鐸
撼敗壁詩者誰漬墨亂濃淡險盡乃復佳疲極復何憾
是節蕤賓初野薦首昌歆煮瀑茶可啜剖石蜜堪噉名
談析毫髮苦語瀝肝膽理冥心自珍機湊首屢領陽烏

書西翥衆色齊慘澹崔嵬識梗楠蒼莽辨葭茨莫投僧
所寰鐘鏜鼓紉紉羣居肅不吳共飯聲有噲迴晚夸奪
場撫事叢百感趨名蛾赴燭逐利魚投摻何時脫火宅
霍若毳去領綺言息誦誦妙供紛醢醢於焉寄相羊庶
以忘坎壈誰云入道苦餘味需橄欖

遊西山同項可立宿靈陰西菴

薄遊厭人境振策窮幽躅理公所開鑿遺跡在巖麓秋
杪霜葉丹石面寒泉淥仰窺條上猿攀蘿去相逐物情

一何適人事有羈束却過猊峰迴遙望松林曲前山夜
來雨濕雲漲崖谷縹渺辨朱甍禪房帶脩竹故人丹丘
彥抱被能同宿名篇聊一詠異書欣共讀蹉跎未聞道
黽勉尚干祿夙有丘壑期吾居幾時卜

上京道中雜詩

發大都

辭親獨行邁遙遙抵京國胡為突不黔驅馬更遠適至
尊有時巡樹羽殷阡陌宿衛必近臣顧問須耆德陋儒

亦何知冗從同執戟草深原野青
雨暗關塞黑寥寥盛
年意眷眷遊子色一身萬人中敢不思努力

居庸關

連山東北趨中斷忽如鑿萬古爭一門
天險不可薄聖
人大無外善閉非捷鑰車行已方軌
關吏多擊柝居民
動成市廬井互聯絡幽龕白雲聚石磴
清泉落地雖臨
要衝俗乃近淳朴政須記桃源不必銘
劍閣僕夫跼謂
我無為久淹泊山川豈不好但恐風雨惡

槍竿嶺

憶昔賜第歸吾母適初度蹉跎歲月晚今辰乃中路居
人誇具慶遊子慙叱馭茲山稱最高揚鞭入煙霧矗矗
多峭峰濛濛饒雜樹崎嶇共攀援躑躅頻返顧陳情未
成表登高詎能賦獨憐山下水遠向盧溝去

李老谷

緣崖一徑微入谷雙崦窄密林日易昏況乃雲雨積行
人望煙火客舍依山色家僮為張燈野老煩避席未覺

風俗殊祗驚關河隔嚴程不可緩子規勿勸客

赤城

鷄鳴秣吾馬晚飯山中行何以慰旅懷赤城有嘉名灘
長石齒齒樹細風泠泠時見巖壁間粲若丹砂明溫泉
發其陽撫訶勤百靈前峰指金閣真境標殊庭白道人
跡稀青崖雲氣生信美無少留緬焉起深情

獨石

解鞍及亭午稍欣煙霧收蒼然衆山出歷歷如雕鏤前

瞻一石獨靈宮居上頭頗聞去年夏水激龍騰湫走避
登屋山夜半齊呀咻幸茲溪澗中今作清淺流晏安不
可懷變化誠難求翠華渺在望行矣毋淹留

擔子窪

自從始出關數日走崖谷迢迢度偏嶺險盡得平陸陂
陀皆土山高下紛起伏連天暗豐草不復見林木行人
煙際來牛羊雨中牧颯然衣裳單咫尺異寒燠佇立方
有懷相逢仍問俗畏途宜疾驅更傍灤河宿

遊寶陀寺

十年望滄海臨流不能度蒼茫歲華晚邂逅舟楫具拂
衣乘天風挂席隨煙霧旦從蛟門發暝指翁洲住前瞻
積水深島嶼青無數梅岑特孤絕遙見日出處寄身人
境外矯首禪關路粲粲金砂石離離白花樹高期愜幽
抱歷覽增遐慕嗒然坐忘言目送寒潮去

上都分院

晨興過桓州旭日生蒼涼舉頭見觚稜金碧何巍煌洪

河貫其前青山環四旁暮投玉堂署鼇峰屹中央升階
旅羣彥官燭分餘光琴冊森在側談笑來清觴列坐無
所為陳詩詠黃唐帝鄉豈不樂父母遠莫將起視雲漢
低垂星爛寒芒南飛有冥鴻邈矣天際翔

送王鍊師歸四明

飄飄采真侶乃在四明山霞居朝帝所瓊館留人間忽
聞雙鳬鳥却向東南還望之若流星邈然不可攀海月
照堦祀天風飛珮環我何苦羈旅冰雪生朱顏

湖上即事

垂雲晝濛濛湖面惟一色
薄暮風更生際夜雪初積凝
陰勢方盛塵境喧暫息坐久聞
欸音忽然破寥闕

題清華亭

名區滙脩渚流望俯平陸
飛雨天際來遠峰淨如沐生
香餘晚華繁陰藹嘉木秀色坐可攬
終然不盈掬觸景幽興多接物
道機熟誰能與之遊食芳飲山渌

曉行湖上

曉行重湖上旭日青林半霧露寒未除鳬鷺靜初散黃
緣際餘景閃倏多遺玩會心乍有得撫已還成歎夙予
丹霞約久茲芳洲畔獨往願易違離居歲方換沙暄芷
芽動春遠川華亂存期乃寂寞取適豈爛漫小隱倘見
招漁樵共昏旦

登錢山望菰城慨然而賦

吳興水為州諸山若浮萍況此一培塿瑣屑世未名所
欣漁樵居乃與緇錫并種竹有萬竿結茅無十楹老僧

解人意蹠履能相迎芳草被行徑朱藤暗巖扃蕭條空
階暮日照莓苔青猶嫌所歷卑未極遊眺情聳身白雲
上始見春申城想當高會時樓觀飛青冥竭海薦壘勺
窮山羞鼎鉶安知千載後寂寞無人行煌煌冠蓋區壤
壤狐兔塋歸來朱門客聽此松風聲

靈源

偶為山中遊遠過雲關宿蒼燈閃初夜雨氣蒸深屋時
聞清梵音窈眇松林曲

鹿田

披榛度空荒突兀崖寺古幽花雜紅白老屋亞雲雨前
瞻石徑微咫尺不得取

寶峰

下山復上山躡屨行沮洳宿雲冒長嶺旭日映高樹山
僧亦何為獨向城闌去

山橋

行行指木末路逐飛雲上時登巨石憩共聽春泉響尋

源竟莫窮即事成幽賞

寶石

暮宿招提境明發首歸路
舉頭望山椒遙認經行處
重巖壑間蒼然正煙霧

雪竇紀遊四首

高人欣相迎山門帶流水
風生珠樹間月窺鏡池裏
觸景遂成迷應接殊未已

幽尋指山椒崖傾忽如瀉
俯身視木末懸水在足下
冥

冥巖岫中晏坐奚為者

詰旦逾西岡草木益深秀梯苔下絕巘坐石看飛溜陰
靈多窟宅欲往不敢又

興移初出山繫纜長汀樹夜來雪已深溪風水難度猶
疑鐘磬音遙遙白雲處

歲晏

歲晏木葉落遙見東城隅雉堞鬱岵堯列屋何蕭疎悠
悠西南望赫赫金張廬退朝集冠蓋鳴珂沸通衢合還

多俊遊並轡飛華裾顧盼有光彩行者為踟躕俯慙筋
力微無從效馳驅日斜坐官舍還拂案上書緬彼川路
長感此年運徂遲迴不能去歎息將焉如

鍾山

平陸漫千里茲山乃穹然猶憐布金地未即辭喧闐巖
液散珠琲春岡走蜿蜒稍欣陟幽邃登頓衣屢褰路細
石蟲蟲崖深竹娟娟洞扉剗開敞峻峰指中天冥探歷
欽崙垂蘿弱容牽碧潭隱光怪華雨漂崇筵下晚飛鳥

輩茫茫但蒼煙渺然元圃期淒涼雲嶠篇休駕將未能
惆悵春風前

柳貫

擬古次吳彥輝編脩見寄韻

昨夕芳蘭英今晨寒露莽凡物榮悴之所慎在交友燕
燕參差飛尚自求其偶何況萬里心僅若風中柳服君
無流黃貽我有珮玖感歎臨長河何山近牛首驅馳苟
可及羸囊具我糗但恐川途脩所期非所有

奉皇姑魯國長公主教題所藏巨然江山行舟

圖

善畫如攻詩意到即奇警蓋其踈儻姿筆墨無容騁歛
之縑楮間咫尺萬里景巨然作江山所得盡幽夔冥深
風雨重曠朗雲霞屏秋光滿帆腹上下天一影白鳥不
盡飛楓林有維艇稍前牛渚磯却後瞿塘頂豈無乘航
戒尚想然犀炳巨靈制坤軸割截爾何猛至今氣淋漓
幅背出光耿人言此非畫與幻本同境然師豈幻者貞

勝以其靜我來覽遺迹皦若天機秉平閭東北長岷蜀
西南永朱邸雪消初春暉浮藻井開圖望神州時節躬
朝請慨思禹功成重喜殷邦靖將鑄岳牧金明堂安九
鼎

文子方寓直翰林數日即使往雲南典選詩
用識別

聖人御世具黜陟用明幽恒持萬里見若與一室謀滇
池徼西南疆理亦中州皇明所照燭獷強悉恬柔緬懷

國利器爵祿廼戈矛稍平銓鑒宗將貽蠶絲憂況提天
官書往即外府籌考擇命詞臣得無慎其由翰林文夫
子見謂能言流受詞別知友大斗醕不酬襍被辭夜直
出門戒晨騶選材古所難此事若冥搜豈無甲乙簿珠
礫同一收施施處士議勞勞城者謳太史制褒貶在子
用春秋將令周道正皇卹楚人咻循吏果再見斯民庶
其瘳得結數十輩參錯置邊陲上以昭王度下以振儒
猷吾徒分院遠被服在林丘

謝無疑將歸延平留詩為別次韻二首

裘葛亦何事為人司暑寒微哉一封垤欲等蒿華看如
將射變率未免噎廢餐我貧不自遂早知行路難解后
與君別好懷詎能安為語南飛鴻雪迹何時漫

龜山載道南伊闕無全書遜翁受李氏一軌行衆塗如
人執著蔡于物察鳶魚至今表鄉學粹美不迂迂得君
羈旅中滯念盡刊除譏評世亦有鑒裁我豈虛唯應雙
劍光賁子幽貞廬

發通州至小直沽

十年鞍馬中釋去理歸櫟江光來娛人似與我意愜疲
勞省前痛歡喜獲新接念當有行初苟志在懷牒何期
腰間組爵等遂凌躡外雖被寵榮內實懼顛踣以茲戀
闕情益欲務脩業清霜弄晚信老樹見留葉沽河漳潞
交冰水尚可涉急漿追南鴻直不數旬浹梅花定迎笑
粲粲光生頰遠遊忘賤貧吾寧負吾鉢

貫草草南歸伯生秘監方晨赴經筵馳詩見別

舟中次韻侯便荅寄兼簡伯庸贊善

講經白虎論載筆承明入此事豈在予鸛鸞正高集乞
身去江湖幸矣歸期及于何君子心繾綣念朋習新詩
比繡段重賜當珍襲因憐管蒯材分寸強紉緝賴承延
鳳輝庶遂谷駒繫皇猷待潤色在治時所急服惟締會
明基藉臺萊立斯文仗公等別袂不須執

雪霽得風徑過高郵

乘舟得順風如鳥新插羽甓湖五十里浪破雪花舞不

知岸勢迴歛覺帆力舉却望煙中竿參差數家聚高沙
舊遊處酒賤魚可煮伸眉一笑粲對面九疑阻得非龍
愛珠逞儁挾雙櫓意令明月胎光燄悶不吐我詩初未
工聊用相媚嫵後朝妙高臺呼雲作吳語

歲暮雜言

中年鞍馬間所歷萬里途髀肉亦既消夢驚還一呼讀
史窺古人恨時不能俱寧知遠遊躅足躡雙飛鳬漠北
松亭塞燕南督亢圖居今采竒迹未覺吾行迂歲暮重

思之天高明月孤

里中三四友論交常莫逆自我遠行邁廿載成乖隔今
歸僅有存生理各崩迫經時不一晤寐想猶如昔閉門
風霰中何以永今夕不見萬松根泚泚養靈魄吾寧獨
多壽持遺同懷客

尊經堂詩

并序

昔趙人安先生以布衣教授里中裒輯羣書大備
經訓使子若孫採擷芳華厭滿膏澤有餘則推之

以及其鄉之人焉去今五十年尊其書猶尊先生
即名其堂尊經堂曰此先生之志也太史屬蘇君
伯脩嘗受經于先生之孫最為得安氏之學者乃
來請詩刻置堂上噫書在安氏而其淑人之功獨
安氏哉詩曰

聖人言純如載道行萬世貞明配日月廣大侔天地簡
牘之所資包絡無巨細上而建皇極重覩人文麗下以
開民彝性初均秉畀訓行宣光熙道否隔氛曠千人萬

人心揭揭皆經誼此息則彼消剛柔乃殊位進乘休復
機迪哲蹈仁智自絕其本根奈何取天劓燔滅滋秦瘠
網羅興漢利存亡書豈知論者常不置濟南耄言出孔
壁發神秘百篇始昭垂五代著成文魯齊韓毛詩其傳
迭興廢審音以知樂亦各徵四至樂崩名僅存緬想歌
鐘肆禮失野可求誰明射鄉義制氏記鏗鏘后蒼詳數
制區區象聲容詎得作者意賴夫春秋家尚識王道貴
載事或稱誣推凡疑翼偽田何受孔易其全緣卜筮楊

施孟梁徒別出踵焦費挾書律始除六籍豈俱逝傷哉

居下流衆惡所犇萃駕言拾灰殘我道猶未墜乘之以
顓門中復縻識緯黨同護朽竹攻弱繫枯魃文字日荻
滋編策亦鱗比孟荀與揚韓先後參輿衛擇精語益詳
炳炳詔來裔一籥節衆音八風無濫吹方張乃遂翕已
矣更五季大明升殿郊熒奎屬炎彗春陵南標正陝洛
黃離繼經世偶潛虛象圖合而異舉隅豈無反僅若小
星曄曄紫陽翁敷賁了羣眎在時張呂間建學特超

詣一鼓行無旁八區同教肄矧茲龍德中美化純漸被
家書動盈屋人事各康濟恭惟罔極恩聖哲布嘉惠經
尊道則尊有合巖度置覆之以堂庭牖戶亦崇邃古史
洎今詮珠駢而玉綴高名以經揭酌原知水味譬如登
喬嶽岡阜左右睇草木流華滋煙雲撒纖翳觀生老其
間面背俱盡晬豈惟一身謀直作數世計是家離石宗
遭亂藁城寄劬書自玉峰舊播實深概子孫刈其熟穰
穰收秉穗後來及門士妙合若龜契尊聞行所知況復

躬自致過逢詔師資忍負築場志我願安氏堂廣作天
下治矜式表國都絃歌行黨術蓄誠以端蒙達生以知
類惇典敘彝倫三郊而五禘與世開隆平吾經固無累
自微可之顯道豈不在器世間有形物展轉資弊弊遊
談亦何根閣束祗自棄是將比鎮寶前人所數遺手澤
尚鮮新一展一流涕晝誦夕思之上帝儼臨泣作詩諗
蘇子孫曾戒無替

旦發漁浦夕宿大浪灘上

張帆得順風飛鴻與爭疾後浪蹙亦舒前山過如失桐
江轉數灣上瀨未入日篙工享安便坐穩頭屢擲人生
倚造物理微難究詰處順安可常離憂詎能必白鷗知
此情故向波間沒

曉發龍門次獨石賦呈楊廷鎮脩撰

日日思南歸乃逆北風去北風不貸客吹雪作寒沍明
當發龍門一昔屢驚怖男兒事結束辛苦在歧路奉命
有程期遄迴豈我據沙平占斗行野斷蹴冰渡重貂襲

裘帽矯矯若紈素據鞍肌骨痛勁氣腸內注口鼻一吸
噓噴喫鬚上露露泣已成澌虬張本非怒瞻前獨石近
投館薪火具聯鑣有佳友執醢起相語我實孱懦姿踰
五已斜暮隩居尚少欣遠役宜多懼明廷集鷁鸞燕雀
一二數曷不捐半菽啄抱隨所慕置危而易安正以縻
爵故先廬趣西陬亦有返耕處吾聞知幾士顏子其殆
庶翩翩不遠復綽綽有餘裕贈君白雲篇還我歸田賦

送劉叔謙赴潮州韓山山長

揭陽海隅郡谿谷藏霧毒賈區乃在城積居跨南服凡
今仕者往喜氣溢僮僕非輕萬里途蓋喜千金蓄子行
攜束書言就韓山讀韓山祀昌黎有酒有肴敕騎麟想
來過盼盼覽遺躅汎除蠻風清沾漑時雨足以茲為教
首如日升若木何必鰐避溪已看鷄應卜今人慕古人
未免傷抑促儒官實閒散歲廩七十斛飽飯取詩哦雲
月與追逐寧無趙子徒彈琴和予筑是將實裒橐果勝
美梁肉毋羞宦轍卑所志三年穀子其厚韓山聽我歌

獨漉我歌倘無證併訊兩黃鵠

渡河宿麻子港口

青山彭蠡尾湖水始生岸一舸破微瀾風帆用其半亂
流二百里午發至未盱蒼茫洲景中明滅津煙畔數家
小聚落漁竈倚灘爨舊聞荏苒間弱肉飽强悍時平道
路清跋涉得無患豈非年穀豐禮義能服叛嚴嚴主湖
神牲酒滿杯案乞靈我豈敢雲黑檣烏散櫓師促轉舵
軋軋鳴鶩鶴前瞻麻子洲波面明星爛新別重有懷縣

情如此祭

宗忠簡公畫像為公外曾孫葉深道作

近古社稷臣生世常不數不能半五百繼見已超卓炎
運昔中否兵氛纏大角掩旆薄日黃張弧北風惡起公
潞陽節仗以障河朔懇懇存趙忠憤極涕橫落扶義亟
西征敵愾為小却佐興靈武功受任留官鑰主辱臣則
何國勢滋以削回鑾累十䟽言諄聽殊藐一死不貸公
百壬吁可作企公如列星宵光仰昭灼幾葉外曾孫傳

世春秋學手圖起予觀言自崇勲閣士雅雖則休隨會
尚堪作蹙國今更非雲飛天一握誰能挽江漢為公洗
河洛

望會稽山

城東鑑湖道水光翻夕鷗雲破青蘿靡稽峰芝掌浮悠
然動余矚玉女開明眸固知穴可探却恐書難求蒲蓮
浩如海微風挾輕舟前山與後嶺導從森幢旒誰張北
斗旗漸進東瀛洲桂枝倘堪折衰白媿重遊

李老谷聞子規

老杜聞子規近在東西川猶云感時物收淚寫幽悵今
我行塞徼子規相後先時夏雲景晦鳥呼搖空煙響入
樹窅窅啼盡血滅滅想知歧路難不惜軀命全千聲復
萬聲喚我歸言遶苟非木石心豈免腸內煎江南叢薄
間有花名杜鵑開時是鳥至相戒治春田不歸如江水
負此今五年風土孰云異物情要有遷寄巢勿浪出祝
爾還自憐嚴程趣行邁且復揮吾鞭

吳萊

觀孫太古周天二十八宿星君像圖

大圓杳何極，鼇柱屹不傾。日月光最耀，衆星莽縱橫。周
天二十八，錯絜各有名。荒哉審厥象，晃朗奪目睛。東垣
青龍岬，西園白虎寧。翺飛鳥隼狀，偃伏龜蛇精。紫宮自
然拱，銀漢無復聲。五行所經緯，甘石知性情。上界足官
府，神人居穆清。韡暎逞幻怪，顙顙振鏗轟。跳踉鬼脚捷，
誦談獸面頰。裳衣乎裸襲，角鬣紛披髻。豈其太白變，嬉

戲類璽纓或者焚惑動威怒流攬搶照臨多芒角躔次
在縮羸揣摩過人料綵繪匪世程伊誰駕一氣得以導
九坑想像陵倒景觀遊撫層城虛空何宮宇蒼莽孰節
旌母寧秉筆際溘此埃風征凡夫本狹見四顧惟寰瀛
夜叉冰澁呀羅刹炎徼瞠鮫女買綃出狗夫銜筯爭祇
疑列宿質却混殊方氓山神對我博刻石華山陞海神
靳我畫浪卷滄海鯨天神詎可識萬古欺瞞盲星占世
有職畫史吾奚評

早秋偶然作寄宋景濂四首

西風吹梧桐一葉兩葉積故書翻有塵雄劍挂在壁時
非合窮困事到即輝赫除却雙鹿行門前少人跡
故人兩三人江北久羈旅尋香古徑風步屨脩廊雨蓊
鱸最有味稻蟹紛難數我欲往從之蠻潮正掀舞
北山有古寺脩竹炎天涼蛟龍踞兩澗鸛鶴鳴層岡心
臺月照白鼻觀煙通香可思未到詠此招隱章
往者東入海飄然任所如大風戕波浪飛雪灑舳艫壯

志昔尚少狂遊今併無誓登盤陀石重望扶桑墟

大食瓶

西南有大食國自波斯傳茲人最解寶厥土善陶埏素
瓶一二尺金碧粲相鮮晶熒龍宮獻錯落鬼斧鐫粟紋
起點綴花毬蟠蜿蜒定州讓巧薄邛邑鬪清堅脫指滑
欲墮凝瞳冷將穿逝哉賈胡力直致鮫鰐淵常嗟古器
物頗為世所捐襤衫易冠袞盤盞改豆籩禮圖日以變
戎索豈其然在時苟適用重譯悉來前大衆幸混一四

海際幅員縣度縛繩絙娑夸航革船鑿空發使節隨俗
混民編漢玉堆積笥蕃羅塞鞍韉城池信不隔服食奈
渠遷輪囷即上據鼎釜疇能肩插葩奪豔冶盛酪添馨
羶當筵特見異博識無庸詮藏之或論價裏此猶吾羶
珊瑚尚可擊磧路徒飛煙彼還彼市我且我栝捲角
獠獨不出記取征西年

時儼

古人重儼疫時俗事禳穰歲陽欲改律輿鬼寢耀銚厲

神乃恣肆魃蜮并猖狂倭僮幸成列巫覡陳禁方虎頭
眩金目元製炳赤裳挑弧毆菑沴豆礫斃瘴剛八靈悉
震懼六合高塞張清寧信不害動靜維吾常世途頗險
鑿人魁更跳梁狐鼠戴介幘夔魑竊香囊煎熬到膏髓
擊剥成疔瘍垂風作國蠹抵隙為民殃自從九鼎沒誰
使百怪藏瘥寒服褫帛飢窶食閒糧蘆花散汝體掾栗
饒吾腸地膚竟卷去天孽俱彫傷神荼欲呀啖蟠木蔓
不長蒙俱強顏貌枯竹無耿光聖言謂近戲五祀徒驚

惶惜哉六典廢述此時儼章

樓彥珍北遊京師予病不及往餞歲晚有懷并
寄彥昭浚常

日晚北風起少年方遠遊徘徊上谷塞眺望黃河流崢
嶸十月冰朔色壓九州熒煌大明殿御道接龍樓時巡
向灤水臘雪擁薊丘前驅鸞鳳旗後乘貂鼠裘尚食豐
宴飫教坊樂箏篴百官散城邑駝馬盡歸休自今帝王
都想爾觀覽周却疑書傳間不謂秦漢優何家非許史

無客不枚鄒投輪即雨集揮袂遽雲浮東航扶桑陰西
竿崑崙陬變化指顧異芻蕘立言收文物彼洛襖土音
吾越謳私將竊祿志勇赴隨陽謀隨陽即澤雁竊祿豈
梁鶯美玉獻劍琕精金鏤希韞出門亟袞束行路肯滯
留布韋謾老耄鄉里惟田疇功名幸一遇螻螳尚公侯
學問敢強飾黍稷待耒耨當令竹帛上直與先達侔毋
使螢爝光肅然寸草秋嗟予久抱疾餞酒弗及筭念爾
忽萬里征夢或見求宣生頗俊逸鄭子復綢繆趾高有

捷步冒正無昏眸早看拜家慶共許動宸旒傳車定不礙闌鑰便若抽杏花開如錦楊柳滿陌頭去時小兒女來詫真驂騑

射的山龍瑞宮問陽明洞天洞蓋是禹穴

意行得古洞忽到陽明天人傳是禹穴愧我匪史遷上摩青冥出湧作芙蓉巔下開巨石窟鬱以藤蘿纏自昔乘四載於茲理百川岳瀆通脉絡蛟螭被拘孥真長或可待宛委空風煙衣冠竟一窆簡札猶遺編世間後百

世龍鬼巧相挺安能洗滌盡却見鴻荒前惜哉不可及
恐此復偶然黃庭或祕景絳府尚靈仙精英倚怪木狡
獪戲神泉尚論鳳文鳥肯降狐鳥筵長嘯望天末白雲
年復年

浦陽舊有明月泉久而不應今乃疏導其源似
頗與弦望晦朔之間相為消長者遂作是詩

大區何渾淪元氣乃潛洩忽然為山水無往不融結遙
天偶一照厚地空餘冽盈將光共生涸與魄同滅元機

自消長至理誰圓缺發揮雖有在窺測尚未決枯查曾
機棲斷泐遽中裂半倚嵐翠雲微通海潮雪昔人來推
求於此得表絕虛亭奚其敞靜甃獨不齧歲年竟悠遠
沙石漸填咽寧加䟽淪功肯使見聞褻恍疑合圖經環
坐到稚耄儻非蟹投碕幾類鮒處轍纖纖浮晶彩湛湛
浸寥泐舊觀方爾還真源可吾蠲爭言彼月行豈為茲
泉設蕭丘胡長寒漢井或再熱逝尋白兔公直探神龍
穴狂歌水仙詞擊碎如意鐵

次定海候濤山

悲歌忽無奈天海何渺茫放舟桃花渡回首不可量南
條山斷脉北界水畫疆居然清冷淵枕彼黃茅岡朝滲
日星黑夜淒金碧光蹲虎巖倚伏鬪雞石乖張磨礱越
湛盧盪泊吳餘皇幽波視若畝巨壑深扶桑招徠或外
域貿易叢茲鄉嗚咿燕國語俱倒龍文裳方物抽所寶
水犀警非常驅鱣作旗幟駕鼉為橋梁似予萬里眼徒
倚千尺檣稍疑性命輕終覺意氣強寄言漆園叟此去

眞望洋便擬學仙子被髮窮大荒

夕泛海東尋梅岑山觀音大士洞遂登盤陀石
望日出處及東霍山回過翁浦問徐偃王舊城

八首 錄四首

茫茫瀛海間海岸此孤絕飛泉亂垂纓險峒森削鐵天
香固遙聞梵相俄一瞥魚龍互圍繞仙鬼驚變滅舟航
來旅遊鐘磬聚禪悅笑撚小白花秋潮落如雪

長嘯山石裂我今在東溟遊目出重徼褰衣窮絕陁奇

氛抱珥赤遠影摩空青想像暘谷水徘徊燭龍形晨昏
相經絡稚耄不得寧豈若柯斧爛看碁了千齡

笑揮百川流東赴無底壑青天分極邊白浪屹為郭弁
裳或時采椎髻亦不惡投珠鮫人泣淬劍龍子愕海宮
眩鱗纓商舶豐貝錯盍不呼巨鵬因風泝寥廓

我行半天下始到東海隅水落焦石出中飛兩鷁鵠情
知瓌竒產勢與險阻俱在夸豈必陋雖聖猶乘桴吭風
丹穴鳳尾雨青丘狐幸隨任公子不愧七尺軀

山中人二首

貧賤素所有豈辭辛與勤
清晨腰我斧往伐西山薪
高巖屹巨壑蛇虎氣逼人
衣裳既不完出入在荆榛
日日一接浙釜甑恒生塵
白石幾時爛青煙空滿鄰
家徒四立壁冬令方行春
亦有偓佺子翛然為世珍

去經十數里霜露淒枯田
蓑笠既挂壁桔槔亦倚垣
相從盡鄰曲言笑仍喧喧
惟此老瓦盆酒漿稍羅前
奈何不解飲而喜鯨吸川
有如善酒人觀者乃在船
寸心久

已醉雙眼方醒然世俗正馳驚悲哉東西阡

秋日雜詩二首和黃明遠

明月出東山流光射窓牖美人曼聲歌翠袖拂南斗別
離終不常歡樂詎能久笑折青桂枝涼風吹我手
西風披白蘋楚客自枯槁扳龍思上天勲業苦不早遐
心隨落鴻短髮等衰草亦有芙蓉花嫣然為誰好

秋夜效梁簡文宮體二首

無奈良夜永起登樓上頭鵲翻金殿宿螢近玉階流梧

桐老葉恨芙蓉新蕊愁
嬖好團扇上那得不驚秋
曾是昔年寵如今誰與同
秋獵長楊苑夜幸猗蘭宮
瓊杯香泣露翠袖薄禁風
將心與明月流入君帷中

吳師道

秋懷二首

江南木葉飛江北百草黃
風煙澹莽蒼悵望川途長
寒魚聚其羣鴻雁忽成行
俯仰念時物索居耿淒涼
昔我二三子敦好攻文章
漂零時相失尺素不得將
人生四

方志企爾揚聲光登山豈無車涉水亦有航真誠諒不
隔離別庸何傷

忽忽意不懌獨步登高丘羣山紛糾蟠前當大河流八
月草木凋萬里風雲愁寒晶蕩白日孤鴻去悠悠鴻飛
不可極其下禹九州古來英雄士百戰橫戈矛念我當
壯年弗獲茲地遊豈無干時略欲往誰見收君看天馬
駒失足羞羴牛

李龍眠蓮社圖

遠公廬山下手種玉色蓮清脩香火社雜還山林賢龍
眠弄筆墨貌出晉宋前橫橋虎溪水古木東林煙鬚眉
策遺老瓶磬趺枯禪石壇花雨落稽首西方仙休吟散
梵帙風鑪薦寒泉矯矯靖節翁歸心赴斜川分手溪上
笑攢眉社中緣淋浪漉酒巾籃輿搖醉眠止飲諒匪難
恥受異教牽空山舊行跡寂寞餘千年竟令妄庸兒懾
誘紛相傳陶翁我尚友掩卷心茫然

送人貢秔米之京

后皇制任土職貢來四方珍異匪余求服食乃其常金
華有嘉種玉粲會芬香土人昔肇端每歲賦其鄉頗聞
播種初行者避畎疆歛收畢徵納老稚不敢嘗擾擾府
中集數日何奔忙珠璣歷萬指錯落照九光圓好中式
度緘封謹縑囊矧今歲旱乾彌望茅葦荒野人懼不供
挈瓶越林岡及茲幸充數揚帆上天倉惟民秉恒性食
芹猶不忘勤動非所辭有司貴循良賢侯重承命護視
嚴周防行行不可遲去去淩風霜玉食儻見登仁恩沐

汪洋願推及物心共樂斯時康陳風以為贈別意何悠
長

金華觀分得琴字

春晏踐宿期雲間陟高岑獲從勝友俱遂此物外心月
窟探萬仞臨淵測重陰盤坐白石臺長嘯青櫟林莫探
虛皇居急雨含蕭森松風飛淙合終夜淒笙琴何能發
孤咏千載同遺音

合歡木

合歡愛嘉名矧復知昏旦淮土產特多蔥龍蔭溝岸離
離青葉解冉冉紅茸散靜和宿露卷動與微風戀物意
豈悅人和樂自堪玩蹇予寡所諧觸事多忿悵亦礙學
嵇生植根向庭畔

九日登響山奉呈同遊者

響山臨響潭曾識太白來我欲遊其間却愧非仙才況
乃縛微官終年走塵埃幸茲九日至獲與羣彥陪高秋
慘雲物薄日翳復開駐馬青松陰披衿上崔嵬前晚孤

城低下瞰清溪迴諸峰送遠色攬結何雄哉野菊半含
英濁醪初潑醅且盡一笑歡良會不易諧溪山宛如昨
斯人化飛灰想見登臨時逸氣橫九垓寧知千載後我
輩茲徘徊呼之儻可作相共揮予杯淒其暮色合颯颯
疾雨催扶攜下登舟水行沿灣隈仰看千仞壁浩歌散
餘哀

廬山紀遊贈黃伯庸

昔聞匡廬名今睹雄秀姿我舟薄其趾陰雨深蔽之平

生潔清念諒受廬君知寧辭三日淹未恨一見遲邂逅
得佳士欣然即追隨時雲散諸峰攢青逗參差五色太
古色相對心融怡披衿尋鹿跡挾洞徵賢祠風雩香餘
韻書臺抗層基前瞻辨五乳仰顧指狻猊却招白鶴仙
下瞰神龍陂飛橋度三峽艤棹凌深危噴濤雷雪眩轉
石雷霆馳薄暮不可留浙浙山風悲明發開先遊寒溪
涉清漪入門雙劍色夾道萬蚪枝飛虹瀉青嶂漱玉下
深池竹亭夔幽闕四壁多殘碑出林送落日踏月仍遨

嬉移舟星子灣回首煙霧時歸來記所歷一一天下奇
茲山信綿邃覽勝猶多遺簡書屬有程逼仄嗟絆羈悠
悠此時路依依後來期巢栖雲松間瓢飲澗水湄昔賢
有高躅安用微官為

望九華山

輕舟下池口遙望青陽郭雲間見九華爭先出鋒鏑參
差啟背缺峭銳圭首削竹箭拔春芽芙蓉攢秋萼竒姿
信明麗遠勢仍聯絡下有巖谷幽真靈諒茲宅詭哉末

世士強以名號託丹崖不受滓青峰鎮如昨千載知屬誰含情寄冥漠

名號託謂
宋齊丘

十二月二十二日宿七里寺書壁

微宦不適意一身抱長憂況此凶歉年餓者擁道周及物豈無念越職非所尤博濟古云難勸分動成仇荒村走風雪破寺寒飈飈中夜耿不眠胡為此淹留

德興開化道中三首

春晨氣澄穉雜卉香滿路
百古鳴高林墟煙澹如霧
農

夫啟門出在野各有務行人獨何為憧憧自來去

宿雲逗踈雨睽睽吐晨旭晴光動千花霞雪眩川谷白
鷗戲深叢黃鳥鳴灌木俯仰竟忘疲歷此溪百曲

兩崖蒼石間湍水激清瀉山桃爛紅芳光影連上下春
風忽怒起意乃媚行者飛花撲人來攬之欲盈把

信饒道中雪

五載樂閒曠閉關每安眠祖行復言邁迫此將殘年江
湖多北風臨流竟回船連旬踏凍雪驅馬不得前錦溪

何淪漪芝山亦清妍豈乏故人居欲往無由緣漫漫四
野白青是誰家煙僕夫慰飢面呼酒還忻然我獨不解
飲自苦誰汝憐前途幸云邇努力勤揮鞭職思在憂民
才薄志自堅只應高人笑胡不甘田園

虎峪淙淙泉

居庸古塞口諸峰並嵯峨左轉萬栗林黃葉墮殘柯路
出草棘間石溝洌微波黃塵歛騰起知有飲馬馳前趨
俯絕壑素礫沒坡陀窮秋水沒竭泓渟不盈科無復聲

淙淙虛名誤來過下馬小徘徊土屋依巖阿野老向我
言深入水木多前年邑中人來此乘干戈委蛇數十里
隘險無誰何桃源志樂土商山有遺歌誰知戰爭場咫尺
隔網羅欲遊苦匆匆斜陽下前坡

分韻賦石鼓送達兼善出守紹興

石刻三代遺獨數岐陽蒐剝落卧榛管竒寶誰見收金
源亦好事馳載來薊丘豈知橋門鎮天為興邦留我老
幸摩挲攷古思西周使君精篆法聲華振皇州足追史

籀製惜值車攻休駢駢五馬來東向會稽遊會稽豈無
碑頌述徒誇浮願言宣仁化嗣續垂千秋

歐陽玄

舟次諸牖寄詩奉謝都水分監瑞卿監丞

抱疴辭承明買舟萍官牖祥襟正無悰蓬底可容納舳
艫尾相銜密次若鱗甲憶初離神京餘暑尚揮箠淹留
近秋杪朝爽欲添袂紆傳進元策走介奉一札使君適
分監羸縮制有法得書即欣然愛我踰素狎遣騶護輕

舟快若歷三峽鄉心鷹脫鞴野性兕出柙昔憂阻殺澠
今喜泛苔雪黃蘆間蒲稗綠藻唼鳬鴨舒懷對幽景寓
目成畫夾公堂為展席觴客禮意洽病予難却酒亦復
飲盈呷吁嗟逆旅途知己元不乏相期遠大器留詩當
盟畝感篆辭則長欲賦慙韻狹

陳泰

秋陰野坐

秋陰何漫漫原野終日晦形羸起徬徨悄愴若有待山

高蒼蔚尊谷狹漁樵對驚風西北吹祥雲偃飛蓋古來
形勝場蟠屈自千載其間豪俊人生死迭相代幽光浩
無窮感發有時會若人世所乖邂逅不可再天運豈吾
能沈吟寄忼慨

御選元詩卷十七


謹案第二頁後七行纏綿阻道里刊本綿訛錦據
黃潛日損齋稿改

第十九頁後三行濟南耄言出刊本耄作髦據柳
貫待制集改

第二十頁前五行炳炳詔來裔刊本詔訛昭據柳
貫待制集改

第二十五頁前八行裳衣牙裸襲案牙古互字刊
本訛作牙據吳萊淵穎集改





總校官庶吉士臣侍朝

校對官檢討臣蕭九成

膳錄監生臣周元

欽定四庫全書薈要

集部

御選元詩卷十八

詳校官原任主事臣李斯咏



欽定四庫全書薈要卷一萬八千四百三十

集部

御選元詩卷十八

五言古詩七

宋聚

送張孟功揚州覲省分題得遊絲

東郭暢景韶飛絲蕩晴朝細逐柳綿度狂隨薰風飄燕
郊縈去策楚岸冒征橈嗟予顧不及相送共迢遙

王君冕關中別墅芳潤亭寄題二十韻

雍壤第上上土厚風氣溫水泉引甘澤卉木茲以蕃興
王作都會山川鬱屏藩維周秦漢唐陳蹟猶具存一覽
以娛目矧此長子孫勝境遇名士相值復何言王君長
安人負郭有田園藍田在其左終南高且尊平川豁瞻
眺崇岡如吐吞結構事幽隱池臺閼重垣植木春茂茂
醜渠夏沄沄晴花炫屋角秋苔黯牆根嵐翠浥圖籍荷
葉蔭壺尊觴詠協時序起居適寒暄生涯付子弟供具
有鷄豚好客時過從租吏不叩門談評及宇宙息偃度

朝昏緬懷鶴在陰大笑螭處視茫然珪組念邈矣車馬
喧茲亭可適意餘事勿復論

君冕為三原縣
令常被誣未雪

題道者山

元氣肇融結律元蟠厚坤蓬瀛訶虛無五岳名號尊茲
山介平營特與太古存碣石拱其側水巖何足論東北
醫巫閭羅列為弟昆境迴稱瞻眺多景移晨昏煙霏雜
遠樹海氣時吐吞幽深閔靈怪勝麗難具言謂宜棲隱
淪秋鶴仍春猿叢桂賦騷雅蘿薜相嬋媛顧此緇衣流

結構開祇園陳迹紛恍惚紀載深本原屢聞賢侯王遊
觀駐朱軒從容樂觴咏風日搖旌旛我昔延祐末東邁
窺其藩望望不得登予懷未能諉于時秋雨霽仰羨思
攀援誰為持此意灑翰題空門

王士熙

送郭子昭淮東經歷

夫君黃鵠姿氣排青雲上嵯峨柏樹枝冰霜激清賞鋒
錯太阿鮮韻叶元石響淮海今勝區疆場記疇曩省俗

出凋瘵主畫酬鞅掌南浦春波深迢迢挂舟往論交心
獨傾撫別意增惆古殿瓊花開題詩寄遐想

題蘭亭定武本

會稽晉名山中有千世寶斯人臨池波歷歷照穹昊流
傳長安道老僧惕如擣昭陵雲霧深玉匣失所保周成
顧命篇垂戈列經誥至今天下人欲觀何由討幸然定
武石難容以智造宋家幾播遷惜哉蹟如埽眼明偶相
遇精神更美好五字未曾缺纔出紹彭早黃庭亦不存

瘞鶴殊渺渺摩挲憶真者鬚髮空自皓

王思誠

按部至嵐州懷舊

早涉卧虎泉曉過飛燕堡北來風泠泠東升日杲杲冰
雪滿髯鬚鱗甲生衣襖候官遠相逢村落飯一飽南嶺
秀雙松亭亭蔭危道山深澗路滑懍懍畏馬倒俄然得
平地深憂豁如埽解鞍西嵐城疇昔一曾到經今二十
年顏色嗟已老念彼同襟人聚散若萍草各在天一涯

誰與脩舊好作詩寫孤懷卮酒聊自勞

胡助

菊山詩

世有隱君子種菊巢空山心同白雲遠身與黃花閒朝
飢餐落英夕飲露未乾幽香被三徑晚節當歲寒林下
非無人獨在柴桑間風味畧相似窮年以盤桓

自靈巖登天平山次柳道傳韻

維昔渡江蹕近在千里甸吳門治清靜西浙稱道院興

懷慶歷初百歲如過電孰有范公賢臯夔素同傳天平
表先塋泉臺封土竈巍巍忠烈祠鄉社春秋薦伊余徒
北歸老色日上面萬象供冥搜四維喜安奠重遊會主
人奉嘗益繁衍席珍柳太常險語情眷戀我語上瀨船
苦思勞挽牽客途春事殘僧窓夏陰轉古木蟠天矯新
篁剝蔥蒨水影澄心空山色照眼絢馮高見黃雲殘秋
行飽麵少飲有餘歡遐覽意忘倦時驚蒼石聳閒悅晴
禽囀共惟吏部公台斗不肯踐頗好偕文士幽討窮林

巘嵌崖白雲泉掬手玩清泫煮茗味獨奇醉來和月嚙
涼風吹客衣激激散冰霰亦有星源尹怡顏時自盼琢
句追大雅放懷即私燕文學吳越裔書工篆隸變載道
靈巖遊山路亦云便鵲夸去已久西子寧復見徘徊響
屨廊尚想吳王殿姑蘇走麋鹿會稽貢竹箭高唱白苧
詞清風日以扇邈哉季子心陰述唐虞禪興亡屬時運
成敗談俚諺吳中美浮圖題榜率輕狷正爾澗谷慙歌
傾襲京下

孫轍

擬古四首次楊志行韻

涉江采芙蓉江水何澄鮮
朱華映朝旭窈窕薰風前
相望不盈咫風波良獨艱
攬之置懷袖撫玩空長歎
春榮衆所慕泯默無復言

孟冬寒氣至眄彼庭中樹
忽得故人書中有相思句
故人隔異縣相望良獨苦
候蟲鳴廣除落葉被衢路
淒其對搖落登高詎能賦
白髮生鏡中荏苒流年度
故人歲

寒姿亦有濟勝具相期佩飛霞共飲金莖露

青青河畔草春至不復腓
延緣被陂坂飽彼羊牛飢
荇時序遷王孫終未歸
西風一蕭瑟楚客空傷悲
安知壯士心金石乃不移
陰陽無停運垂柳生金絲
鳥鳴百花開迴首乃爾為
大夫貴自勗千載以為期

明月皎夜光出自河漢東
衆星爛以繁牽牛正當中
永懷乘槎人上與河源通
遡遊往從之杳杳將安窮
至人凌倒影千載幸一逢
願言攬其袪一洗塵埃空
乘風遊

汗漫歷歷天九重有志未能就憂心徒沖沖

方瀾

石門夜泊

積雨暮天豁炊烟隔林起人喧落帆處野語新月裏桑
逕綠如沃麥風寒不已一夕舟相銜擾擾利名子

許謙

遣興四首

秋日常苦短秋夜不可闌葉鳴迅風晚蟲怨零露寒月

白天炯炯振衣起盤桓山川出浮滓翳彼明不完幽興
中道絕百感來無端何當誅豐隆致身無羽翰清光亦
何私不照方寸丹

猗猗澧有蘭馥馥沅有芷獵獵石上蒲泛泛水中芰鮮
鮮三逕菊旒旒百晦蕙采掇集衆芳粲爛成雜佩佩服
何所從將以待君子

春風榮衆芳秋露悴百草羲和策日月疾急兩飛鳥枯
桑號天風俯仰波浩渺氣流物隨化金石不自保人生

寄蜉蝣時邁胡不老天地有終窮微眇何足道
乾坤無停運清氣日夜生人居覆載間所息能不萌握
機養天和持守如捧盈得喪固有命寵辱何足驚一身
磐石重萬鍾浮雲輕丈夫有志願誰謂我無成

華蓋山

羣山如斗形華蓋氣獨壯奮身地勢高目極天宇曠周
回萬象澄一一來獻狀中江漾孤嶼瀕海橫疊嶂樓臺
市中居棋列相背向烈風攪蒼林落日鳴白浪蜃氣薄

浮雲溟濛杳東望長濠浸寒水短楫起漁唱同遊豈特
達竟爾忘得喪山下出蒙泉夷坐待清漲一掬襟懷空
自謂羲皇上

暮過東津館

薄暮下東津灘急舟劇箭漁燈互明滅隴月時隱見清
颼從東來涼氣襲我面目送兩山青天長淨如練

舟中雜興三首

錄二首

冉冉江上蘆離離路傍草霜露侵衣裳何用涉遠道鴻

雁方有序孤飛任林表豈不顧其羣長風翮難矯

嵐煙紫崔嵬波光滉漾星宿縣虛蓬雲雨暗逸槳震
澤商氣深雄風駕濤浪白鷗與蒼雁來往同簸蕩吳潮
海門闊飛雪噴秋響重重越山迎汨汨溪流上舟行歷
旬日佳景閱萬狀孤征抱結思所感重悽愴安得同心
人詠歌共清賞

採藥

亭亭北山松宿藹蔭深碧蒼根走虬龍巨幹蟠鐵石平

生棟梁具不受霜雪厄兔絲得所附裊裊挂千尺流脂
入九地千歲化琥珀我欲掇其英俯仰費搜擿紅鑪轉
丹砂石髓變金液但恐茫昧間圖驥不可索意長時苦
促雙鬢日夜白刀圭或可試習習在兩腋蓬萊三萬里
詎謂弱水隔他時來山中故老應不識

用潘明之韻遣興

秋山撼虛林秋水揚素波緩衣踞蟠石怡盼庭樹柯芳
景良可惜去日亦已多天寒道路遠奈此兩鬢何興來

勿引酒醉飲空悲歌丈夫志有適慷慨捫太阿

陳樵

悅心亭

清晨攬衣起感物暢我情春風從何來草木忽已榮
深池躍遊鯨喬木遷鳴鶯俛仰極萬類氣機足生生
哲人貴冥會悠然竟何營此樂難具述酒至且復傾

送吉夫北上

之子冰雪姿冥心學仙真官卑且勿念況復憂其貧
邇

來太白山山勢凌秋旻雲盡月照夜花開鳥鳴晨閒居
少公事猿鶴為比鄰採芝過林麓釣魚遊水濱七年不
得調幽興如逸民通塞任物理聊用安此身憶昔始相
識交情日相親問君鍊藥說祕之不肯陳金液且莫採
何以製水銀豈伊蓬萊中無分追後塵君今別我去九
闕朝帝宸功名信可就慎勿煩精神閨風青峩峩海波
白粼粼他年重會面笑盼桃花春

雙拍

題畫

亭亭山上柏柯榦如青銅蒼古拔俗姿肯作兒女容風
霜日搖落萬古為之空爾獨不見摧屹立如老翁乃知
歸根妙生意恒內融願乘雷雨興化作雙飛龍

瓊林臺

上清瓊林臺似有千仞崇琪樹交柯生瑤草亦成叢幻
境類元圃凝輝接琳宮天花或時墮縈紆颺迴風仙人
薛元卿手持玉芙蓉傲睨八極表洞見萬象空飛書約
王子弭節延赤松步虛朗歌咏流響入雲中

丁復

甘雨昨日足

甘雨昨日足今日豈不遊文漪散清沼綠樹未驚秋步
出西郭門浩浩江漢流危檣隘川浦乃有遠人舟江租
赴海漕驚沙無定漚號呼走羣吏肉食懷鄙謀及時不
歸耕卒歲何用周悄悄綠髮子還家多白頭為農極凋
瘵猶用苦誅求

竹山

離離鳳食榦縣互亘脩巒君子懷靜儀虛貞媚蒼寒靈
厓發潛穎崇苞閔幽盤筮鄰從蔣詡永結求羊歡

同縣尹張志道徵士黃觀復陰秀才燕集六縣
校官葉仲庸池上分韻已而互相為和三首

分得碧字

江水秋未清林暉午能碧相忘散亂坐幸老談笑劇以
君久寒氊且爾暫暖席同心勿辭飲況有陶彭澤

次韻殿字

堂堂瓊林客籍籍金鑾殿一官巖州最再調淮縣見

謂張

也張以丙科授黃巖州判再授淮東六合縣尹

人生逐日老世事浮雲變亦有

古宮臺淒涼入荒甸

次韻下字

王日不注官從天得長假年衰豈能高老坐不許下新
秋席為展欲夕尊未罷誰揮魯陽戈請駐羲和駕

題秋江晚渡圖

白雲在青山紅葉爛無數亦有冬青枝長松共如故茅

堂當樹間江光澹凝素扁舟不可呼誰令汝來暮

楊信可

和揭曼碩兼懷武昌名勝

親友日以踈江漢日以深孤雲懷海嶠倦翮思長林終
然無所知沿流動悲吟豈無後日期邈若隔千岑安得
好風來泠然入中襟日與親友會微言自規箴

和盧子儀寄懷盧肅政上巴陵王侯

人生有知遇永懷不可忘俯視萬丈淵仰睇千仞岡青

山何其高江水空自長忽憶石梁叟別我半載強昨者
從湘中歲晏歸朔方孤舟渡淮水遺歌滿滄浪迢迢天
際雲青青陌上桑

次韻酬呂文學

後會未可必前路轉多山鷄鳴發孤館蒼涼雲樹間俯
視清溪流仰睇高鳥還念此別離情南山正孱頑

薩都拉

宿臺城山絕頂

江白潮已來山黑月未出樹杪一燈明雲間人獨宿近
水星動搖河漢下垂屋四月夜深寒繁露在脩竹

題焦山方丈

江風入霜林寒葉下踈雨蕭蕭復蕭蕭可聽不可數山
僧亦好奇呼童埽行路何處覓秋聲肩輿入山去

寄朱舜咨王伯循了即休五首

并序

元統二年秋八月僕與淮東憲副朱舜咨廣東僉
憲王伯循會于瓜洲江風山月亭上過金山登妙

高峰飲酒賦詩京口鶴林寺僧了即休風雨渡江
贈別少年遊詞既而即休辭去舜咨伯循留廣陵
僕獨涉淮過河北人生聚散信如雲萍屈指歲餘
舊遊如夢向日舜咨有雨過江色淨五字天趣妙
發未克竟篇茲以一字為一韻賦詩寄上舜咨伯
循二前輩鶴林主者了上人

木落淮南秋蘭撓泊瓜渚把酒三人同江亭看飛雨雨
過江色淨妙景發天趣歷歷江南山一一青可數

大江湧金山穩若青蓮座山下有龍宮見水不敢唾江
山萬古同日月片帆過把酒妙高臺狂歌醉相和

飄飄鶴林僧布韞青鞵雙長江飛錫渡海磬魚龍撞遠
來作偈別楚雨鳴秋窓振錫獨歸去天花飛滿江

微茫揚子橋細雨濕秋色小艇載吳姬搖搖語相接風
起布帆高一往不再得夜宿廣陵城吹簫怨明月

霜高木葉空江清水花淨離懷江水深楚女晚妝靚按
拍聽歌聲點筇行酒令白露滿衣裳迴野垂斗柄

宿烏石驛

雲起烏石峰雨灑紫溪嶺孤館如山深愁人覺宵永燈
花翦復開風竹亂不整清晨渡閩關南斗落衣領好寫
度關詩點筆題石笋

度閩關二首

曉度分水嶺身在雲霧中手扣天上關聲落山下風雷
霆走澗壑神人過虛空既訝奔豐隆亦可招祝融頃刻
開萬象赤烏飛嶺東

白雲下千峰盡入懷袖裏振衣度閩關灑作山水仰
登天無梯俯視井無底古來守關人豪傑存有幾寒食
百草青春風吹不起

過嶺至崇安方命棹之建溪

人生天地間馳馬歷大塊行樂須及時流光逝難再役
役功名羈歷歷山水邁偉哉東南區奇險閩粵最車書
四海同風氣一嶺界肩輿度層霄手棹下急瀨四山抱
回流環合如束帶玉井蓮葉飄仰高天作蓋倏馳丹峰

前却在紫嶺背微雲間煙霞踈雨灑松檜深林樵牧歸
落日山鬼會雪瀑挂冰簾林風響天籟石梯駕仙巖往
往遺骨在瑤草石上生丹藥市中賣巍巍考亭祠過客
下祠拜溪水自成文上接洙泗派喚渡雲門僧貌古清
可愛手把青松枝趺坐溪石罅懸崖虹棧危插竹魚網
曬山高人蟻旋下視舟一芥輕舫類飛鯁宛轉亂石隘
崢嶸龍角尖礪砢鼇首癩槎牙激頽波出沒如水怪萬
古槌地雷三峽瀉萍拜峰巒爭送迎奔走萬馬快箭過

耳生風開口不暇咳峭壁走衝流恍若巨鼇戴山有舊
題名歲久字刻壞豈無姓名存彷彿年月載覽此前人
蹤徒為後人慨天氣易寒暄光陰倏明晦浩蕩三日程
應接千萬態會登天柱峰一覽宇宙大少吐胸中豪神
遊八方外題詩贈山靈清氣留勝槩

夜興

千峰走晴雷風力吹邊雨層雲不成陰殘缺如敗堵山
深日易暝孤館孰賓主燈花翳復明落葉聲可數獨立

誰與親厨人夜深語

秋日池上

顧茲林塘幽消此閒日永飄風亂萍踪落葉散魚影天
清曉露涼秋深藕花冷有懷無與言獨立心自省

題茶陽驛飛亭

白雲飛出山怒擘蒼峽裂幽谷濕晴雲絕壁灑飛雪萬
折入滄海龍宮水晶闕簸揚弄珠人冰簾挂寒月

將至大橫驛舍舟乘興暮行

山行日已暮肩輿度林薄涼飈淒以清松子當面落千山月崔嵬萬葉雨蕭索昨夕擢歌行頗憶溪上樂

郭囉洛納新

登崆峒山

緣蘿陟層巘曠望浮雲馳飄風西北來飈飈吹裳衣氣
候倏遷變中懷鬱歔歔路逢一道士高結冠巍巍恐是
廣成子載拜欲問之長歌入深林棄我忽如遺哀湍瀉
石磴日落松風悲靈蹤邈難及千載生遐思

賦環波亭送楊校勘歸豫章

積水敞華構參差帶幽壑微風動輕蘋綠雲泛珠箔天
空夕陰歛川迴遊鱗躍徘徊滄洲夢露下翠衾薄公子
屬鳴珮逍遙陟延閣微吟省樹移緩步庭花落放舟返
春渚言恣林泉樂揮觴靡可留悵望青山郭

送葉上舍晉歸四明

涼空夕陰霽繁星烜明河夜色浩如水秋聲在庭柯遊
子千里情歸心向江沱亭亭太白巘宵宵煙雲多落月

挂松檜古屋依清波結縞豈不蚤流光恐蹉跎振衣出
橋門晨興理征艫清淮集魴鯉曠野飛駕鵝顧我羈旅
間執別將如何持觴易水上慷慨驪駒歌遠眺東南山
鬱鬱雲嵯峨

送道士袁九霄歸金坡道院

朔風吹黃沙客子夢千里青山久不歸白日去如水昨
朝灤水上仙人偶來過自言遠紛塏結廬在金坡玉峽
棲層雲翠閣縈危棧鐘聲繞碧壇桃花出深澗雙童埽

白石展布彈瑤琴青松挂落月海色浮空林竟謝區中
緣騎龍忽歸去祇恐人民非那愁歲年暮君還鍊石髓
九轉成元霜他時肯分贈碧落同翱翔

送危助教分監上京

驅馬涉大河堅冰若平地雪霰在須髮顏色漸憔悴迨
遯出恒趙迤邐入燕薊幸託君子交情親不予棄裏衾
屢就宿下榻辱延致諄諄味道言情非骨肉異振鐸趨
雍宮胄子夙尊畏適從甘泉幸晨理赤城轡我獨增煩

憂中夜不能寐崎嶇數千里欲盡平生意忽如參與商
令人發長喟都門候迴轅淅淅秋風至

逍遙室為鄒上舍賦

嘉樹翳學省繁露夕零亂琅琅讀書聲歷歷在霄漢君
子慎齋居編簡夙潛玩秋蛩咽斷甃流螢襲虛幔燈燭
耿餘輝沉沉夜將半宴坐遂忘言羣疑自冰渙聖道日
脩明元譚乃虛誕願君善其用毋為發深嘆

題應中立所藏陳元昭山水

遠騎出郊坰裴徊立清曉風雨江上來雲山望中小松
瀑瀉巖阿僧鐘度林杪茲焉倘可棲長歌拾瑤草

松巢為錢塘謝堯章先生賦

結廬東山下門外萬松立月明樹根坐露華衣上濕鶴
歸洞雲暝風生海濤急茯苓倘可餐永矢謝城邑

鶴齋為道士薛茂弘賦

仙人倦騎鶴築室住空山桃花落几上白雲入窓間昨
從青城遊路逢采樵者遺以山君銘刻之崖石下開門

望赤壁明月滿中天
宵宵玉笙韻祇在青松顛
茅君不可招
雙舄下京縣
借問幾時來
笑指壁間箭
我有碧玉軫
與君彈九臯
曲終忽長揖
飛珮翬煙霄

京城雜言五首

神京極高峻
風露恒泠然
憧憧十二門
車馬如雲煙
紫霞擁宮闕
王氣浮山川
峩峩龍虎臺
日月開中天
聖祖肇洪業
永保萬億年

丘公神仙流
學道青海東
維時儒教師
矯矯真天龍
乾

坤始開廓魚水欣相從扣馬諫不殺嘉辭動天容保此

一言善元祚垂無窮

世祖常因金儒元好問之請為儒教大宗師復納全真丘處機之一

言國家始終好生不殺

居庸土高厚民物何雄強老稚閑弓獵不復知耕桑射
鵬陰山北飲馬長城旁駝羊足甘旨貂鼠充衣裳酒酣
拔劍舞四顧天茫茫

高槐拱朱垣樓閣倚空起劍佩何陸離車馬若流水昔
有社稷臣艱難闢荆枳歃血飲黑河剖券著青史國家

感動勞報施及孫子

千金築高臺遠致天下士郭生去千載聞者尚興起我
亦忼慨人投筆棄田里平生十萬言抱之獻天子九關
虎豹嚴撫卷發長喟

郊城冬夜讀書有感

幽窓悄無寐稍覺塵慮清月色下床頭映我書冊明微
燈照孤影慨彼華髮生永懷古先哲勞心但營營

發大都

南陽有布衣杖策遊帝鄉憂時氣激烈撫事歌慨忼天
高多霜露歲晏單衣裳執手謝親友驅車出塞疆雲低
長城下木落古道旁憑高眺飛鴻離離盡南翔顧我遠
遊子沈思鬱中腸更涉桑乾河照影空彷徨

劉黃祠

唐劉黃幽州昌平人謫死柳州歷遼金
無能發潛德至本朝天歷間昌平驛官

宮祺始奏建

劉諫議書院

入郭日已暝慘澹楓葉赤鞠躬荒祠下低迴想遺直劉
君素忠憤伏闕論邦國痛陳腹心禍竟罹考功斥餘子

盡騫騰鬱鬱負慙色鄉人仰高誼千載崇廟食悲歌風
蕭蕭感慨情惻惻出門無行人涼月照東壁

龍虎臺

大駕巡幸往返
皆駐蹕臺上

晨登龍虎臺停驂望居庸絕壑閔雲氣長林振悲風翠
華有時幸北狩甘泉宮千官候鳴蹕萬騎如飛龍帳殿
駐山麓羽葆羅雲中我行避馳道弗得窮幽蹤衣裳倏
涼冷積霧浮空濛前山風雨來驅鞭復匆匆

榆林

出關喜平曠前林樹扶疎微茫候煙火參差見廬美
人秋水上娟娟映芙蓉隘車騎塞山寒日將晡行人
問旅舍投鞭息馳驅張燈秣駑馬斷捩餘青芻夜涼衾
裯薄悵悵愁前途鷄鳴山窓曙去矣毋躊躇

槍竿嶺

山腰長城
遺跡尚存

飲馬長城下水寒風蕭蕭遊子在絕漠仰望浮雲飄前
登槍竿嶺岡岑鬱岌崩崖斷車轍層梯入雲霄幽龕
構絕壁微徑紆山腰人行在木末日落聞鳴蜩履險力

疲繭憑高思飄飄何當脫羈鞅歸種南山苗

李老谷

谷中多杜鵑

高秋遠行邁入谷雲氣暝稍稍微雨來漸怯衣裳冷
縈紆青崦窄杳窈煙林迴峰迴稍開豁夕陽散微影霜葉
落秋澗寒花媚秋嶺途窮見土屋人煙雜墟井平生愛
山癖愒此愜幽靜月落聞子規懷歸心耿耿

赤城

金閭山在赤城西郊洞明真人脩鍊之所山中盛產青李來禽諸果

休駕赤城館憑軒望前山飛雨西北來亂灑石壁間風

寒樹撼撼水落沙斑斑牛羊盡歸柵微燈掩松關野老
頗留客及此農事閒項筐出山果濁酒聊慰顏移尊對
金閭靈宮鬱孱頑安得吹簫人乘鸞月中還

龍門

元統間知樞密院事都時特穆爾過峽中
見二羊關山椒樹間頃刻大雨水溢姬妾

輜重皆
為漂溺

崢嶸龍門峽曠古稱險絕䟽鑿非禹功開闢自天設聯
岡疑路斷峭壁忽中裂雲蒸雨氣暝石觸水聲咽羸驂
涉溝澗執轡屢愁蹶憶昔兩羝羊忿鬪蛟龍穴暴雨忽

傾注淫潦怒奔決人馬多漂流車軸盡摧折我行愁陰
霾慘慘情不悅日落樵唱來三歎腸內熱

檐子窪

昔多盜賊今置巡檢司于
山椒其山無林木皆蔓草

朝發牛羣頭夕憇檐子窪高秋得清曠野蔓多幽花黃
雲翳日脚草色浮天涯山荒樹寂寞寒陂落昏鴉頗喜
盜賊清塞田盡禾麻至今將軍壘日落聞清笳我生久
羈旅崎嶇涉風沙天寒道路遠曛黑投山家

次上都崇真宮呈同遊諸君子

鷄鳴涉灤水慘淡望沙漠穹廬在中野草際大星落風
高班馬嘶露下貂裘薄晨霞發海嶠旭日照城郭嵯峨
五色雲下覆丹鳳閣琳宮多良彥休駕得棲泊清尊置
美酒展席共歡酌彈琴發幽懷擊筑咏新作主時屬承
平幸此帝鄉樂願言崇令德相期保天爵

陽明洞丁元善尊師攜酒招省郎穆蘇君過余
夜飲

仙人釀松華留客中夜酌微風樹間來細雨鐙前落清

詩憶彌明高興懷康樂
移尊過西軒
匡坐聽笙鶴

還京道中

客遊倦縑塵夢寐想山水
停驂眺遠岑
悠然心自喜
晨霞發暝林
夕溜洄清沚
出峽涼風馳入谷
塞雲起霜清
卉木踈
日落峰巒紫
迢遞越關河
參差望宮雉
家童指歸路
居人念遊子
各嗟行路難
深乖攝生理
終期返南山
高揖謝城市

送王子充歸金華

東郊雨新已蔚蔚春樹稠驅馬郭門外持觴送華輶念
子客京縣意氣如雲浮文章儼秦漢雅頌窺商周世無
楚和氏誰能識琳球褰衣別親友長揖謝王侯天高落
日遠驂駢駐河洲顧我在韋布執袂情悠悠願如大江
水與子俱東流

陳旅

次韻毘陵吳寅夫見寄

季子江海居勝友園池賞臨水咏新詩輕飈送流響丹

花陽林吐綺翼幽竹上雲瀾阻塵躅離思徒浩漭杪秋
辭京邑寒郭艤吳榜宗兄念行役旨酒勞鞅掌承子共
清悰論文發豪爽我貧久僑棲所至類樂廣願得陽羨
田寧慙五湖長夙昔詒約言遲暮嬰世網衆仙諒超遙
樓觀滿方丈餘霞散文席斜月生翠幌芳夕令人思思
之不能往晨興即高岡引睇寫孤想

湖上分韻得春字

君子佩明信相期湖水濱時欣宿雨霽畫舸送遊人輕

鷗集蘭渚佳樹變鶯晨山遠煙容澹日出水光新美人
含麗思豔曲歌陽春睽攜會彌歡酣適趣益真茲遊敦
德誼況乃及芳辰

題秋山圖

之子託沖隱秋山樓觀深矧茲及霜晨遐矚沈氛陰翠
巘含白雲丹楓映青林靈谿鳴石溜野屋負層岑趨喧
事多違即曠恒愜心何哉芳月宴而我阻幽尋

題米元暉溧陽溪山圖

宿雨散層巘林麓翳煙霏遙山斷復連川上初昕微我
昔困行役溧陽秋未歸幽子喬松流解后啟郊扉撫景
正若此別離嗟願違覽卷遂終日溪雲欲生衣

春日思遠遊

春日思遠遊遠遊欲何止角哀見楚王伯桃樹中死出
門逢路人天下無二子春山一萬重春江一萬里上有
無心雲下有無情水

次韻答都下友人二首

百金買駿馬千金買紅妝長安畫樓上飲酒吹笙簧天
天園中桃鬱鬱陌上桑美人越山下白髮生雕房
涼風振高梧繁露集幽菊攬衣起徘徊殘月照我屋曾
襟鬱孤清日日塵眯目銀河在天上手短不可掬

西山詩

并序

至順三年六月之吉西山新寺之穹碑樹焉是日
百僚無敢不至碑所余與趙博士繼清早作出平
則門沿大隄並駐蹕亭下轉入湖曲逢趙宗吉成

漢卿二編脩與劉敬先典籍騎驢從蒼頭挈匏尊

邀余與繼清就隄側藉草坐灌木延陰風冷然生

澗底幽鳥鳴其上命蒼頭隄傍取荷為盤以實腊

肉倒尊中濁醪飲數行甕山流黛與湖影相盪潏

於杯盤巾袂之上余在京師七年蓋未有一適如

此時也酒盡三君子起曰子於此能無詩乎余言

歸即賦之及歸以職事縻繞少清趣明年三月宗

吉持紙來索詩戶外雪深二尺無他客乃賦詩曰

蓐食出西郭初日明遠川聯鑣走山麓山樹盡含煙紫
石擁馳道綠水侵弄田高人湖上來解后野澗邊茂柳
垂密幄曾莎布柔氈回風颭幽爽有鳥聲清圓采荷薦
珍腴洗琰行芳泉夫容濯新雨迴立方嬋娟晤言攄素
抱逸思慕遐騫窈窕紺園夕珠林映璇淵黃金作臺殿
縹緲集諸天顧慙凡躅汙亟去不敢擅適意無先期重
尋有中惓華月忽易改賞心與時遷晨興望雲物皓雪
滿層巔

郊居

郊居息塵事日夕望青山
青山秋氣多白雲出其間
露渚野芳集楓林江色寒
夷猶感流序況乃曠幽攀

題泛舟圖

江雲生白石水木澹幽姿
雙松出叢薄翠色集遙枝
落日明極浦楚岫正參差
美人鼓蘭枻歲晏將何之

安福李氏臨溪亭

結屋負南郭清流屋前端
居塵事少水木自幽妍
滌

硯弄寒泚鳴琴寫潺湲沙鳥時近人汀雲相往還烹鮮
笔溪毛留客坐前軒逝川道體著觀物悟微言

劉致

對月

涼宵在前墀佳月墮我側此月如此心曠朗一片白開
樽起相娛佳月即佳客月如感知已為我好顏色此時
還獨醒奈此月明夕

題錢玉潭竹林七賢

門巷寡轍跡靜對溪南竹溪水淨堪染竹色與分綠有
時溪相向襟抱如瑩玉安得萬蒼筤遮植青溪曲豈無
嵇阮輩遁世尊往躅浩歌日酣燕達生亦云足

傳若金

雜詩三首

植蘭彌九畹種菊被三徑幽芳固殊姿馨德良可並
蘭以為美餐菊以資命賸言理蕪穢恒使枝葉淨蕪穢
苦易侵枝葉苦不盛豈無桃與李貴此諧野性

窮巷有畸人夙夜勤古道敝衣適至骭疏食恒不飽歌
聲若金石顏色終歲好豈無當世念所趨惡能巧美玉
不足珍懷義以為寶

異人言種石可以致雙壁千金受元秘辛苦乃有獲溫
其比君子韞櫝良愛惜青蠅易為汙恒恐傷厥德連城
不願售思以置君側終歲無與言持之將安適

送陳衆仲助教赴江淞儒學提舉

秋風吹浮雲鳴雁復南翔山川何慘慄草木日夜黃客

行歲云除僂懷舊鄉君行即吳會執別此河梁淮泗
多奔流雲海浩茫茫靈颺翼飛艫馳景曜征裳去途日
以遠來會日已長援之不可得躑躅情內傷

九日夷山驛

馳驅涉長道時節良易更去日能幾何商颺颺以盈元
蟬號且息羣雁翩南征茲辰揆重九在俗豈殊情抗袂
出虛館登高望舊京圓穹無留翳素顥有餘清延矚周
四遐但見古時城頽宮委蔓草喬岳襲前名茫茫陰陽

間感此百慮并我性不解飲虛觴聊自傾

和趙德隆秋夕雨

落景翳重城凝陰起初夕蕭條飛雨至散漫輕颿激洒
幌靜彌多喧簷暴復息清商亂急管遙怨生離席遊子
恒念鄉氣淒感時易既興北風歎亦抱南山戚晨鷄不
廢度征雁無寧翼嚮道乖夙期寸陰違所惜詠歌良可
興幽懷坐填積

雪中送宋上舍仲敏歸滑州省親

北風何烈烈雨雪亦霏霏遊子去成均將歸古靈昌詩
書豈不樂歲晏懷我鄉我鄉伊可懷父母在中堂休告
亦有時定省焉可忘浮雲踰大伾白日照宣防子行日
已至送者各盡觴當歌念遠遊令我媿中腸

四月十四日發京

六龍西北馳羣鳥東南翔感我客遊士心神隨飛揚迢
迢踰大河怱怱越崇岡已驚時序易復念道路長驅車
出東門浩歌慨以慷燕薊豈不樂吳楚為我鄉父母久

違離兄弟不在旁當茲遂歸去聊可慰中腸

劍門圖

劍門天下險亦復天下壯崢嶸扼西南氣欲軋萬象石
壁摩往來風湍東奔放深蟠虛無底峭出日月上二儀
含崎嶇萬古設眺望一夫或當關強敵不敢傍胡為昔
人國恃此亦傾喪聖朝今無外皇化極浩蕩勢狹秦漢
爭治同唐虞讓乃知不在險六合德可王前年南中行
其地少平曠縣車度重隘束馬下疊嶂翻疑蜀道坦劍

閣固殊狀及此觀畫圖間關愁西向浮雲從中來日暮
一惆悵

九鷺圖

鮮鮮白鷺羽振振清江溼露草寒已衰風蘆近相蔽飛
鳴各自適離居亦有次雖愜江海情終懷雲霄志君子
思有則畫者工取譬儀羽庶可希脩潔誠所貴

羣雁圖

微茫洞庭野隱約瀟湘岸鴻雁將栖息飛鳴求其伴先

集良未安後至淒欲斷使我懷弟兄因之中腸亂留連
江海遠慘淡秋暉晏常恐隨天風高飛入雲漢

題雲崖圖

高崖含青空雲氣所出入綢繆日千態嶄絕恒特立雨
合龍挂低風迴鳥飛急寄言為山者進簣庶可及

題山水小景雜畫四首

空村斷行跡深雪連昏暮慘淡既平岡坡陀復盈路時
聞一樹折猶見羣鳥去中有映書人柴扉對何處

江白雲稍歸山青樹如沐輕舟漁石渚獨騎經林麓野
氣昏已明泉聲斷猶續坐憶泛湘時村西見茅屋
雲歸山欲暝月出泉相映石影生夜寒松聲起僧定遙
疑露下立或發風中詠幽境何間寥長廊罷鐘磬
盤盤蒼山根泉石如素練含風靜復響觸石驚相濺竹
迴秋氣來松涼夏陰轉山翁閱妙理獨立無人見

題墨梅二首

老樹亞晴空踈花帶寒野風流不自惜澹泊從人寫歲

晏孰能娛空山少來者

孤花何婉婉玉立含幽素短短時出橋踈踈或臨路生
疑簷下月半照牆西樹

題蘇氏耕樂堂

少年思薄宦既老思田里耦耕非吾事素食良所恥時
雨行東臯平疇被流水興言命童稚東作從茲始飯牛
桑苧陰乘耒郊原裏舊麥既青青新苗復靡靡升堂舉
杯酌閒暇閱經史有秋庶可待敦本聊自喜古人不復

存斯士亦云已食力吾所安夜行貴知止

題宜春鍾清卿清露軒

清卿能琴

秋氣集太虛夕光溥高樹時聞陰液墜暗識商飈度
旄旒星動林英英月霏霧涼局息塵想幽琴寄元悟
寂歷松上聲逍遙丘中趣釣天澹斜影銀漢藹微素
古調今所稀太音誰能喻仙人飲沆瀣壽命金石固
千歲不可期空歌徒延慕

黃清老

古詩六章送王君冕歸陝西

名弁甲寅進士

麥熟天乍熱開軒理瑤琴
茲晨有客至一逕蒼苔深
日出樹影倒曠坐分綠陰
清談落餘花松風雜幽禽
君子希道德永言結同心

園林步春曉芳徑澹已開
日出露未晞孤吟池上臺
虛閣納翠光硯寒欲生苔
清坐契心賞白雲時入來
君子晚相識南山碧崔嵬

西山三月春萬物好顏色
鳥啼自宮商花開各紅白
滔

滔東流水千里在頃刻風雨入遠林苔痕有新籜鷄鳴
潮欲上山月遲歸客

狂風卷茅屋遙見溪上山人生有遇合離別何足歎黃
鵠將西歸臨水振羽翰我有雙明珠置之青雲端朝朝
復暮暮照君千里還

少年處山谷壯歲遊京師性本狻鶴羣焉能牛馬馳曩
有採薪憂挂冠願為醫近得聖賢心讀書甘如飴習貫
已成癖豈無君子知

十載宦京輦田園就荒蕪茲焉擬歸耕休馬南山隅舉
酒樹色動鶯燕鳴相呼流水既送君白雲亦邀余錦囊
可贈遠媿非明月珠

訪子威都事不遇

同年
狀元

清曉抱綠綺來就夫君彈夫君久已出野水流花間石
澗度微雨秋生湖上山松陰坐永日心與雲俱閒人事
有離合白鷗聊共還

招友人

晨雨洗餘花塵慮日蕭散芳草綠如茵空林坐春晚遙
思江上客尊酒媿折簡臨流擷嘉蔬共此林下飯

送楊信父歸臨江

自別武夷君海水落幾丈當年尊俎地顛倒疊橫嶂君
從山中來應見桃花開秦人笑相語媿我非仙才茫茫
八極中雲月秋徘徊苦吟不出門孤負黃金罍劃然西
風生拂我琴邊埃願從雙白鶴去去不復回

送李子威代祀嵩衡淮海三首

天香出金門春色動遠山使者持節去翩如跨雙鸞崔
嵬嵩少峰卓立乾坤間中夜南極浮星河遶天壇石室
有寶書泉鳴玉珊珊安得揖浮丘青雲驂羽翰

羣生望甘澤五岳雲氣通天香落巖谷瑞靄春冥濛海
潮天際來金碧森萬峰劃落紫翠堆亭亭玉芙蓉古廟
絲竹存迎神奏黃鐘空山遞餘響落花舞青童

南海祝融宅汪洋載神州巨浸涵萬有元氣何空浮蒼
蒼島嶼間彷彿通十洲神魚在深淵甘霖何以求朝折

若木枝夕飲桐柏流萬里一瓣香豈徒司馬遊

山行二首

愛山不知倦緩步成幽尋觀泉度疊嶂攜日穿層林
眺彼枝上鳥少憩松間陰蕭然清風來發我松下琴
白雲邀我飲流泉永我吟曾謂塵中人不知君子心

采采巖下菊菊老花壓地泉露飄我衣擷英不盈袂
錚然松子落林下遠風至沈吟不成詩支筇領山意

送僧定觀歸

詩僧百丈來復作五臺別丁然振金錫桂子落秋雪山
空白雲間風息萬籟滅相思何處無江湖一明月

番陽舟中聞友人消息因贈

岑堯九天門玉署青鎖闥老我煙霞心參商坐寥闊十
年望春雲不忍鑷白髮鴻雁還塞來頻頻附書札江湖
秋水淺舟楫苦不達不知南山陽梅花為誰發

題竹外一枝梅花

仙標何處來一枝倚寒玉晴窓見疎林座上春可掬山

陰帶殘雪水影兼遠綠珍重孤竹君歲寒伴幽獨

武夷道中

積雨多浮雲百川合為一新晴落花深草逕沒行迹溪
風淡和柔天宇浩澄碧諸峰出雲間淨若露初拭遲遲
策駑馬稍稍度翠壁從人不知疲佳境恣所歷松間古
仙人燕坐松下石羽化今幾年蒼苔滿雙屐乾坤妙無
言小大自有得為我謝羣芳春風各努力

于欽

登太白樓

清泗遶任城何年謫仙遊人間失酒星落月惟空樓騎
鯨八極表鳴鳳三千秋此俊不可得雲山生莫愁

陳德永

送同知黃巖事林起宗滿歸

浮雲暮南征遊子思他鄉官清甘旨少有母不得將昨
夜夢倚門攬衣起徬徨翩然忽復去水遠三山長

胡枋

送別李伯實五首

錄三首

情通萬里親遠別恐遼絕徘徊言笑間春愛終糾結以
鏡投月中相照亦何切上下雲與塵輝光豈淪滅

我有五色絲投子錦繡機前織鴛鴦紋後織連理枝一
尺裁為雙卷懷各置之千歲兩端合永無棼所治

十五結交初大學同詩書纏綿二十載雙雙水中魚君
髮今已斑而我白髭須同門半為鬼成材者誰歟我心
永如帶周匝繫君裾

陳鈞

宿江陰廣福寺

我非山中人暫借山中宿
靈風散微陰片月出喬木
蕙帳棲夕香亡井汲寒綠
名緇多夙契延坐同茗粥
況與靜者俱繕性久已熟
清詞麗陶謝元談幹身毒
所媿形跡拘無由繼高躅
鐘聲殷江島露氣靄林麓
良遇愜素懷徘徊至天旭

楊鎰

贈石維秀才

石子山中來衣上白雲濕俯仰時自謠鏗鏘溢篇什註
書空林間花落常自拾明晨城南去相望空悵悵

雨至

維南有崇山山上多浮雲靜聞微雨至寂寂在西軒曠
然無所懷端坐復何言不知春向深況知賤與貧

楊鑄

題宋氏南軒

脫灑謝塵喧棲神在巖戶殘雲床下起昨日山中雨緣
澗弄驚流攀林翫芳樹非關薄時榮逍遙自成趣

晚憩澗北亭

我性喜蕭散東園時獨行高亭俯絕澗下有流泉聲秀
木翳繁陰朱華散微馨踟躕愴忘歸夕露沾我纓人生
忽如寄何乃苦營營優遊在空谷飲水有餘情

夏日山中讀書

翳翳嘉木陰結廬三四椽南風五月中日夕聞鳴蟬居

閒復奚為涵泳聖人言時於會心處掩卷自欣然

岑安卿

夢中作

積雨稍開霽晴川擢孤舟雙目豁陰翳四望餘雲收輕
風生衣袂灑灑舒煩憂橋橫落日迴水與山俱流白鷗
洲渚涼黃鳥林塘幽十旬九陰雨茲晴信難求美景與
心會及暮猶遲留賓朋愜清賞晤語更獻酬歸途見明
月華巔風颼颼

次茲息菴冬日海棠韻

盈盈宮錦仙厭彼繁華場當春不自獻
婉婉懷無方託根旃檀林金仙借恩光
羣陰正凝沍特與回春陽拒霜宜媿死
江梅亦羞香翻令桃李顏應有趨時傷
定惠一笑姿未免隨春芳始信鶴林仙
解逞非時妝

周權

懷別

青桑蔽繁陰元鳥春將暮東風老松花
長林翳黃霧俛

首事鉛簡流光暗中度淮水日夜流美人邈難晤賓鴻
盡北歸誰與達書素長歌復徘徊晴川渺煙樹

遊山寺

空林淨如埽石徑穿嶺細紺廬出深樹飛湍下雲際偶
逢赤髭侶囑我聽真諦松肥齋鉢豐樾古佛燈翳遭簷
棘籬短野枳香入袂夕磬兩三聲半巖花雨霽

溪之濱

小雨淨川綠翫心鷗鳥羣拂蘚憩幽磴松花點衣巾禪

局杳何處疎磬時遠聞青煙濕山道牛羊下斜曛

仙源

桃花悄無有仙源渺何許流水青於銅松色與崖古長
林莫蕭颼似與幽人語翛然卧空菴清猿夜深雨

夏日偕友晚步飲聽泉軒

終日局環堵散策窮深幽嘉我二三子落落誠罕儔適
意隨所詣行行遂經丘青松如高人含風自蕭颼夕雲
度深翠爽氣衣上浮石根瀉幽泉戛戛鏘琳球樂彼泉

上趣幽構飛岑樓新蘭秀而滋舊竹清且脩歟我情頗
厚清尊頻獻酬盤桓有餘樂嘯傲成遲留池深風露香
荷意澹欲秋飲散衆喧息微月生林陬

接竹引泉

蒼潤隱石脈幽源迸山椒連筒入雲竇勢接河漢遙引
茲一線秋高下穿林梢聯絡裊相拄旋折不辭勞挽之
歸我廬晴雨注屋茆乍室或細細久續俄嘈嘈空階落
琴筑虛甕鳴鈞韶盥足自潔心迹良已超固無鼎釜

珍頗煮溪澗毛未能學許由厭喧解風瓢

湘中

天寒楚雲淨木落湘山幽空江夜來雨水滿蘆花洲西
風何渺渺滄波日悠悠有懷誰與言注目孤鴻秋


松下泉

長松蔭層巒岱色入崖骨鬱為翠雲浮蒸滃香不歇融
液作寒泉飛迸出石窟不濯輒紅塵空山瀉明月

御選元詩卷十八

謹案第十三頁後八行過金山登妙高峯刊本山
訛陵據薩都刺天錫集改

謹案卷十八第二十四頁前四行都呼特穆爾舊
作都刺帖木兒今改 二十五頁前六行穆蘇
舊作穆薩今改



總校官庶吉士臣侍朝

校對官檢討臣蕭九成

謄錄監生臣周元